

पत्रुसं चवःगु निगूगु पौ

म्हसीका

पत्रुसं थ्व निगूगु पौ न्हापायापिं हे विश्वासीतय्त चवःगु खः। थ्व पतिइया मूरुख्य उद्देश्य फताहा गुरूतय्सं याःगु ज्या व इमिसं ब्यूगु शिक्षां ब्वलंगु मभिंगु खँलिसें ल्वायेगु खः।

येशूयात खंपिं व वय्कःयागु शिक्षा थःगु हे न्हाय्पनं न्यनातःपिनिपाखें इमिसं परमेश्वरं व प्रभु येशू ख्रीष्टयागु खँ बांलाक स्यनाः कयातये धुंकल। थ्व हे विश्वासयागु बः कयाः इमिसं थुकथं फताहा गुरूतय्गु शिक्षा ज्यालगय् मजू धकाः सीके फइ धकाः पत्रुसं ध्वाथुइक कनातःगु दु। पत्रुसं अप्वः यानाः ख्रीष्ट हानं लिहां वइमखुत धकाः धयाजूपिनिगु खँ न्ह्यथनातःगु दु। ताःतक पिया चवनेमाल धायेवं वय्कः भाइ हे मखुत धयागु खँ जुइमखु, बरु वय्कः ला परमेश्वरं धयादी थें “सुं नं नाश जुइ म्वाःले मा, तर फुक्कं थःथःगु पापं लिचिलाः वये मा” धकाः पियाचवनादीगु खः। थ्व पौ रोमं चवःगु खः।

धलः पौ

न्ह्यखँ	१:१-२
परमेश्वरं सःतादीगु	१:३-२१
फताहा गुरूत	२:१-२२
ख्रीष्ट दकसिब्य् लिपा भाइगु खँ	३:१-१८

२ पत्रुस

पत्रुसपाखें ज्वजलपा

१ येशू ख्रीष्टया दास व प्रेरित सिमोन पत्रुसयापाखें भी परमेश्वर व भीत मुक्ति बियादीम्ह येशू ख्रीष्टयागु धार्मिकतां याना: जिमिसं थें तःजिगु विश्वास काये खंपिं फुक्कसित ज्वजलपा।

२ परमेश्वर व भी प्रभु येशूयात म्हसीका वंलिसे छिमित दया माया व शान्ति अप्वः दयावने मा।

परमेश्वरं सःतादीगु व ल्ययादीगु

३ पवित्र जुया: म्वायेत माःगु फुक्क खँ भीसं परमेश्वरया शक्तिं हे कयाचवनागु दु, छायाधाःसा थःगु इज्जत व गुण बीत सःतादीम्ह परमेश्वरयात भीसं म्हस्यू। ४ थथे वय्कलं भीत तःधंगु व तःजिगु आशिष बियादी धकाः बचं बियादीगु दु। वय्कलं हे धयादीकथं भीपिं परमेश्वर थें जुइ फइ, अले संसारयागु लोभ लालचं याना: स्यनिगु पाखें बचय् जुइ फइ।

५ अय्जूगुलिं छिमिसं विश्वास याना-

चवना: जक मगाः, भिंपिं जुइत नं कुतः या। अले हानं भिंपिं जक जुयां नं मगाः, ज्ञान नं दय्कि। ६ अथे हे ज्ञान जक दयां नं मगाः, चालचलन नं भिंका जुइ माः। चालचलन भिनां जक मगाः, मन थातं तया चवने माः। मन थातं तयां जक मगाः, परमेश्वरयात मानय् नं याये माः।

७ परमेश्वरयात मानय् याना: जक मगाः, विश्वासीतय्त दया माया याये फय्के माः। अले हानं विश्वासीतय्त जक मखु, विश्वासी मखुपिन्त नं माया याये फय्के माः।

८ थ्व फुक्क याना जूसा छिपिं यक्व ज्या याइपिं व फल सय्कीपिं जुइ। अले प्रभु येशू ख्रीष्टयात छिमिसं बांलाक म्हसीके फइ। ९ थथे मयाइपिं मनूत ला मिखा कांपिं हे धाःसां छुं पाइ मखु। इमिसं थःगु पुलांगु पाप सिला छ्वये धुंकल धयागु नं ल्वःमंके धुंकी।

१० अय्जूगुलिं यःपिं दाजुकिजापिं, छिमित परमेश्वरं हे सःता: ल्ययादीगु खः धका: क्यनेत कुतः या। थथे यात धाःसा छिपिं गुबलें हे स्यनी मखु।

११ अले भीत मुक्ति बियादीम्ह भी प्रभु येशू ख्रीष्टयागु न्ह्याबलें दया च्वनिगु राज्यय् छिपिं नं दुहां वने दइ।

१२ अय्जूगुलिं थ्व खँ फुक्कं छिमिसं स्यू, अले छिमिसं विश्वास यानाच्वंगु सत्य खँय् छिपिं क्वात्तुक च्वनाच्वंगु दु धका: स्यूसां जिं छिमित लुमंके बीत थ्व खँ च्वयाच्वनागु ख:।

१३ म्वाना च्वंतले थ्व खँ छिमित लुमंका बियाच्वनेगु जित: तसकं भिं ताल। १४ भी प्रभु येशू ख्रीष्टं जित: धयादीगुलिं जि अप्व: म्वाइ मखुत धका: जिं स्यू। १५ जि सिना वने धुंका: नं छिमिसं थ्व फुक्कं खँ न्ह्याबलें लुमंकातये फये मा धयागु जिगु आशा ख:।

ख्रीष्ट त:धं धयागु साक्षी

१६ जिमिसं येशू ख्रीष्टयागु त:धंगु शक्ति व वय्क: हानं भायादीतिनि धका: छिमित धयागु खँ मनूतय्सं कंगु बाखं मखु। वय्क: गुलि त:धं धका: जिमिगु मिखां हे खनागु दु।

१७ दकलय् त:धंम्ह परमेश्वर बा:नं येशूयात त:धंका: थथे खँ ल्हानादीगु जिमिसं हे न्यनागु ख: — “थ्व जि य:म्ह काय् ख:। थ्व खना: जि तसकं लय्ता।” १८ पवित्रगु पर्वतय् जिपिं

वय्क: नाप दुबलय् स्वर्गं धया ह:गु थ्व खँ जिमिसं हे ता:गु ख:।*

१९ अय्जूगुलिं न्हापायापिं अगम-वक्तातय्गु खँ सत्य ख: धका: जिमिसं भन बांलाक सिल। थ्व खँ छिमिसं न्यंगु नं तसकं हे बांलात, छाया:सा इमिसं धयावंगु खँ ला सुथ मजुतले खिउँथाय् च्यानाच्वंगु मत थें ख:। अले छिमिगु नुगलय् थिनाच्वंगु सुथसिगु नगु ख:। २० दकलय् न्हापा-लाक अगमवक्तातय्सं धयावंगु खँ इमिसं यसें धयावंगु मखु, परमेश्वरं धाय्कूगु ख: धका: छिमिसं थुइका तये माल। २१ अगमवक्तातय्सं धा:गु खँ मनूतय्सं यसें धा:गु मखु। इपिं परमेश्वरया मनूत ख:। अय्जूगुलिं पवित्र आत्मां इमित धयादीगु खँ जक इमिसं धयावंगु ख:।

मखुगु खँ स्यनिपिं मनूत

२ न्हापा न्हापा नं मखुगु खँ स्यना जुइपिं अगमवक्तात दया व:गु ख:। अथे हे छिमिगु पुचलय् नं मखुगु खँ स्यना जुइपिं मनूत दयावइतिनि। अज्या:पिं मनूतय्सं छिमित मखुगु खँ जक स्यनाबीगु कुत: याइ। इमित मुक्ति बियादीम्ह येशू ख्रीष्टयात हे इमिसं त्व:ता वनी, अले याकनं हे

स्यना वनी। २अथे इमिसं धाःगु मखुगु खँ न्यनाः यक्व मनूत मभिंगु लँय् वनी। अथे मभिंगु लँय् वनाः मभिंगु ज्याखँ यानाजूपिन्सं यानाः मनूतय्सं सत्ययागु लँयात हे मभिं धकाः धाइ। ३अज्याःपिं मनूतय्सं लोभलालचय् लानाः छिमिके हेय्का कायेत मखुगु खँ दय्काः स्यनी। न्हापांनिसें हे अज्याःपिं मनूत दोषी खः धकाः परमेश्वरं धयादीगु दु। अय्जूगुलिं अज्याःपिं मनूत याकनं हे हासनास जुया वनी।

४पाप याःपिं स्वर्गदूततय्त हे नं परमेश्वरं ल्यंका मदिसे नरकय् छ्वयादिल। न्याय याइगु दिन मवतले इमित नरकया खिउँथासय् चिनाः तया तल। ५न्हापा न्हापा परमेश्वरं थ्व संसारय् च्वंपिं मभिंपिं मनूतय्त लः बाः वय्काः स्याना छ्वयादिल। अबलय् परमेश्वरयात मानय् या धकाः स्यनेकने याना जूम्ह नोआ व वया न्हय्म्ह मनूतय्त जक परमेश्वरं बचय् यानादिल।* ६अथे हे सदोम व गमोरा धाःगु शहरतय्त नं परमेश्वरं मिं छ्वय्काः भस्म यानादिल। मभिंपिं मनूत फुक्कं अज्याःगु हे गति जुयाः सिना वने माली धकाः संसारय् च्वंपिं मनूतय्त ख्याच्चवः

बियादिल।* ७सदोम शहरय् च्वम्ह लोत भिंम्ह मनूयात धाःसा परमेश्वरं बचय् यानादिल। अन शहरय् च्वंपिं मनूतय्सं यानाजूगु मभिंगु ज्याखँ स्वयाः लोत वाक्क हे वय्का च्वंगु खः।* ८थ्व लोत भिंम्ह मनू जूगुलिं अन च्वंपिं मनूतय्सं न्हियान्हिथं मभिंगु मभिंगु ज्याखँ जक यानाजूगु खनाः तसकं हे हीमी चायाच्च्वंगु खः। ९भिंपिं मनूतय्त परमेश्वरं दुःखकष्ट जुइबलय् बचय् यानादी। अले मभिंपिं मनूतय्त न्याय याइगु दिन मवतले गथे तया तये माः धकाः परमेश्वरं स्यू। १०अप्वः यानाः थःत जक यःथें मभिंगु बांमलाःगु ज्याखँ यानाः व परमेश्वरयागु अधिकारयात हेपय् याना जुइपिं मनूतय्त वय्कलं तःधंगु सजाँय बियादी।

अज्याःपिं मखुगु खँ स्यनिपिं मनूत तसकं तःधंछुइ माः। अले इमिसं थः स्वयाः तःधंपिन्त हनाबना तइ मखु, हेपय् याना जुइ। ११अज्याःपिं मखुगु खँ जक स्यना जुइपिं मनूत स्वयाः तसकं तःधंपिं व शक्ति दुपिं स्वर्गदूततय्सं नं प्रभुया न्ह्याःने इमित ब्वः बी मछाः।

१२इपिं ला पशुत थें च्वं, अले इमिसं बिचाः याये मसः। पशुत थें ज्वंकाः

स्याकेत हे इपिं बूपिं खः। इमिसं मथूगु मस्यूगु ज्याखँय् परमेश्वरयात ब्वः ब्यू जुइ। अय्जूगुलिं इपिं जंगलय् च्वंपिं पशुत थें हासनास जुया वनी। १३ कर्पिन्त दुःखकष्ट बिया तःगुया पलेसा इपिं नं दुःखकष्ट हे फयाः सिना वनी। न्हिनय् हे इमिसं थःत यःथें मोजमज्जा याना जुइ। इपिं नाप नयेत्वने यायेगु हे छिमित मछालापुगु व हेला जुइगु खँ खः। इमिसं न्ह्याबलें थगय् यायेत जक स्वयाचवनी। १४ इमिसं न्ह्याबलें व्यभिचार यायेत जक स्वयाचवनी। न्ह्याक्व हे पाप याना जूसां इपिं गुबलें लुमधं। इमिसं बमलाःपिं मनूतय्त थःगु ल्हातय् काइ। अले इमिगु मन हे लोभ यायेगु ज्याय् लाये धुंकल। परमेश्वरयागु सराः इमित हे लाइ। १५ इपिं भिंगु लँपु त्वःताः मभिगु लँपुइ वनाच्वंगु दु। अगमवक्ता जुयाः नं मभिगु ज्या यानाः धिबा कमय् यायेत स्वःम्ह बओरया काय् बालामयागु लँपुइ इपिं वनाच्वंगु दु। १६ बालामं थज्याःगु पाप याये मते धकाः ब्वः फये माल। अले बालामया गधानं मनूया सलं नवानाः वयागु वें बिचाःयात दिका बिल।*

१७ थज्याःपिं मनूत सुनावने धुंकूगु बंगाःचा थें खः, अले हानं इपिं ग्वःफसं पुइके यंकूगु सुपाँय् थें खः। इमिगु नितिं परमेश्वरं तसकं खिउँसे च्वंगु गाः दय्कादीगु दु। १८ इमिसं तःधंछुयाः फुइँफाँय् यानाजुइ। अले नकतिनि हे जक पापं लिचिलाः धर्मी जुइत कुतः यानाच्वंपिं मनूतय्त नं लोभ क्यनाः मोजमज्जा यायेगुलिइ सालाहइ। १९ इमिसं हे हानं मुक्ति बीगु धकाः धया जुइ, तर थःपिं हे पापया दास जुया जुइ, छायाःसा मनूतय्त छुकिं त्याकल मनू उकिया हे दास जुइ। २० अले हानं भीत मुक्ति बियादीम्ह प्रभु येशू ख्रीष्टयागु भिंगु खँ न्यनाः थुइकाः संसारयागु मभिगु पापी ज्याखँ त्वःता च्वने धुंकूपिं मनूत हानं थ्व हे संसारयागु मभिगु पापी ज्याखँ तुं यायेत वन धाःसा इपिं न्हापा स्वयाः तसकं मभिपिं जुइ। २१ थज्याःपिं मनूतय्सं थःपिन्त बिया तःगु पवित्र आज्ञायात सीक सीकं त्वःता छ्वयेगु स्वयाः ला गुबसं हे मन्यंगु जूसा तसकं बांलाइगु खः। २२ थुपिं धापू कथं हे इमित जूगु दु — “खिचां थःम्हं ल्हःगु थःम्हं तुं नइ” अले “म्वःल्हुका ब्यूम्ह फा हानं नालय् तुं वनाः बुतुबुलाः सनी।”*

प्रभु हानं भायादी तिनि

३ १यःपिं दाजुकिजापिं, थ्व नापं जिं छिमित पौ च्वया हयागु निकः जुल। निगुली नं जिं छिमिगु यचुगु मनयात लुमंका बियाः न्ह्यलं चाय्केत थ्व खँ च्वया हयागु खः। २पवित्रपिं अगमवक्तातय्सं न्हापा न्हापा धया थकूगु खँ छिमित लुमंका बीत जिं कुतः यानाच्चवनागु खः। अले हानं प्रेरिततय्सं न्यंका थकूगु मुक्ति बियादीम्ह प्रभुयागु आज्ञायात लुमंका बियाच्चवनागु खः।

३दकलय् न्हापां थ्व खँ सीकि, लिपा लिपायागु दिनय् थःत यःथें सना जुइपिं मनूत वइतिनि। अले थज्याःपिं मनूतय्सं छिमित गिजय् याइ।* ४इमिसं थथे धाइ — “येशू भायादी धकाः धयागु मखु ला? ग्व, गन दु येशू? जिमि तापाःबाज्यापिं सिना वने धुंकल। सृष्टि याःबलय्निसें थौं तक नं अथे हे तिनि, छुं नं मपाः।”

५परमेश्वरं नवानाः स्वर्ग सृष्टि यानादिल, अले पृथ्वी लखं दय्का-दिल धकाः सीक सीकं इमिसं मस्यू थें याना जुल।* ६थ्व पृथ्वी लखं हे दयावःगु खः, अले हानं लखं यानाः

हे अबलय्यागु संसार नाश जुल।* ७परमेश्वरयागु वचनं हे आःयागु आकाश व पृथ्वीयात मिइ छ्वय्केत बचय् यानातःगु दु। पापी मनूतय्त न्याय यानाः नाश मयातले आकाश व पृथ्वी दयाच्चवनी।

८यःपिं दाजुकिजापिं, थ्व खँ ल्वःमंके मते — प्रभुयात छन्हु नं द्वःछि दँ थें, अले द्वःछि दँ नं छन्हु थें खः।* ९गुम्ह गुम्हय्सिनं मतिइ तःथें प्रभुं थःमहं धयादी थें यायेत लिपा लाकादी मखु। अथेसां छिपिं सुं नं नाश मजुइमा, अले फुक्कसिनं पश्चाताप याये मा धकाः वय्कः पियाच्चवनादीगु खः। १०प्रभु भायादीगु सुनानं सी मखु। अबलय् आकाश तसकं सः वयाः मदया वनी। अले आकाशय् च्वंगु दक्व फुक्कं छ्वयाः नौ जुयावनी। पृथ्वी व पृथ्वीइ च्वंगु नं दक्व फुक्कं नाश जुया वनी।*

११थथे फुक्कं नाश जुया वनिगुलिं छिपिं गज्याःपिं मनूत जुयाः म्वाना च्वने माः? छिमिसं पवित्र जुयाः, थःत परमेश्वरयात देछायाः म्वानाच्वने माः। १२परमेश्वर भायादीगु ई पिया च्वँ। अबलय् आकाश छ्वयाः नौ जुयावनी। आकाशय् च्वंगु फुक्कं

३:३ यहू १८ ३:५ उत १:६-९ ३:६ उत ७:११ ३:८ भज ९०:४

३:१० मत्ती २४:४३; लूक १२:३६; १ थेस ५:२; प्रका १६:१५

क्वाना: नाया वनी। १३थथे जुइ धुंका: हानं मेगु हे न्हूगु आकाश व पृथ्वी दय्कादी धका: परमेश्वरं धयादीगु दु। थ्व न्हूगु आकाश व पृथ्वीइ धर्मीपिं मनूत जक चवने खनी। थ्व हे न्हूगु आकाश व पृथ्वीयात भीसं पिया-चवनागु ख:।*

१४अय्जूगुलिं य:पिं दाजुकिजापिं, थथे गुबलय् जुइ धका: पिया चवनिपिं जुया: छिमिसं प्रभुयात लय् ताय्केत कुत: याना च्वं। पापी ज्या याना मजुसे पवित्र जुया च्वं। थुकथं छिपिं परमेश्वर नाप मिलय् जुया च्वं।

१५थबाय् तक भाया मदसे प्रभु पिया चवनादीगु पापी मनूत बचय् जुइमा धका: ख:। भी य:मह किजा पावलं नं परमेश्वरपाखें बुद्धि कया: थ्व हे खँ चवया त:गु ख:। १६पावलं चवया त:गु पतिइ नं थ्व हे खँ न्ह्यथना

त:गु दु। गनं गनं पावलं चवया त:गु खँ थुइकेत थाकु। बांलाक मस्यूपिं मनूतय्सं व क्वात्तुक विश्वास याना चवने मफुपिं मनूतय्सं ला चवया त:गु खँया अर्थ हे हीका छ्वइ। थथे हे इमिसं धर्मशास्त्रयागु अर्थ नं हीका छ्वइ। थथे इमिसं थ:त थ:महं हे स्यंकी।

१७य:पिं दाजुकिजापिं, छिमिसं थ्व फुक्क खँ सी धुंकल, अय्नं होश याना च्वं। मखुसा मभिंपिं मनूतय्गु खँय् लाना: छिपिं क्वात्तुक चवने मफया: थ:गु थासं कुतुं वनी। १८भी प्रभु व मुक्तिदाता येशू ख्रीष्टयागु दया माया अप्व: दयावने मा। अले छिमिसं वय्क:यात अभ् नं बांलाक म्हसीका वने फयेमा।

वय्क:यागु नां आ: व सदां त:धना चवने मा। आमेन।